

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԱԶԳԱՅԻՆ ԺՈՂՈՎԻ ՆԱԽԱԳԱՀ  
պարոն ԳԱԼՈՒՍՏ ՍԱՀԱԿՅԱՆԻՆ

Հարգելի պարոն Սահակյան

Ձեզ ենք ներկայացնում Հայաստանի Հանրապետության կառավարության եզրակացությունը Հայաստանի Հանրապետության Ազգային ժողովի պատգամավոր Թևան Պողոսյանի՝ օրենսդրական նախաձեռնության կարգով ներկայացրած «Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» Հայաստանի Հանրապետության օրենքի նախագծի (Պ-943-05.02.2016-SS-010/0) վերաբերյալ:

Ներկայացված օրենքի նախագծի համաձայն՝

1) Հայաստանի Հանրապետության կառավարությունը յուրաքանչյուր վեց ամիսը մեկ անգամ իրականացնելու է սահմանամերձ համայնքներում և դրանց հարակից տարածքներում Հայաստանի Հանրապետության քաղաքացիների պարտադիր կանխարգելիչ բժշկական քննություն.

2) արտահիվանդանոցային պայմաններում պարտադիր կանխարգելիչ բժշկական քննության բժշկական ծառայությունների ցանկը հաստատում է Հայաստանի Հանրապետության կառավարությունը:

Այդ կապակցությամբ հայտնում ենք, որ՝

1. «Սահմանամերձ համայնքների սոցիալական աջակցության մասին» Հայաստանի Հանրապետության օրենքի 5-րդ հոդվածի համաձայն՝ սահմանամերձ համայնքներում և դրանց հարակից տարածքներում ականների պայթյունից կամ Ադրբեջանի Հանրապետության տարածքից իրականացված ուժգնական կամ ահաբեկչական գործողությունների հետևանքով վիրավորված Հայաստանի Հանրապետության քաղաքացիների բժշկական օգնությունն ու սպասարկումն իրականացվում են պետպատվերի շրջանակներում, իսկ Հայաստանի Հանրապետության կառավարության 2004 թվականի մարտի 4-ի N 318-Ն որոշման N 2 հավելվածի 12-րդ կետի 3-րդ ենթակետի համաձայն՝ բնակչության բոլոր խմբերին անվճար տրամադրվում է պետության կողմից երաշխավորված արտահիվանդանոցային բժշկական օգնություն և սպասարկում (բացառությամբ ստոմատոլոգիական ծառայությունների)՝ Հայաստանի Հանրապետության առողջապահության նախարարի կողմից սահմանված ծառայությունների ծավալների շրջանակներում:

Հայաստանի Հանրապետության բնակչության համար ամբուլատոր-պոլիկլինիկական բժշկական կազմակերպություններում մատուցվող բժշկական օգնության և սպասարկման ամբողջ ծավալը (ներառյալ առողջության առաջնային պահպանման ծառայությունները, ամբուլատոր-պոլիկլինիկական դիսպանսերային և նեղ մասնագետների կողմից իրականացվող բժշկական օգնությունը, ըստ բժշկական ցուցումների՝ լաբորատոր-գործիքային ախտորոշիչ հետազոտությունները) իրականացվում է պետության կողմից երաշխավորված անվճար ամբուլատոր-պոլիկլինիկական բժշկական օգնության և սպասարկման շրջանակներում: Հայաստանի Հանրապետության առողջապահության նախարարի 2013 թվականի սեպտեմբերի 13-ի N 47-Ն հրամանի N 2 հավելվածով հաստատված առողջության առաջնային պահպանման բժիշկների կողմից կանխարգելիչ այցի կազմակերպման չափորոշիչ 1-ին կետի համաձայն՝ մեծահասակների շրջանում առավել տարածված ոչ վարակիչ հիվանդությունների

կանխարգելման նպատակով առողջության առաջնային պահպանման ծառայություններ իրականացնող բժիշկները պլանավորում և իրականացնում են իրենց մոտ գրանցված մեծահասակ բնակչության տարեկան մեկ անգամ կանխարգելիչ քննություն՝ բժշկական կազմակերպություն տվյալ բնակչի կատարած առաջին այցի, ինչպես նաև հիվանդությունների կապակցությամբ կատարած տնային կանչերի ժամանակ:

Նշված կանխարգելիչ քննության ընթացքում իրականացվում է առողջապահական հարցերով կրթում և սկրինինգներ՝ հիվանդությունների վաղ հայտնաբերման նպատակով:

2015 թվականի հունվարի 1-ից մեկնարկել է «Հիվանդությունների կանխարգելում և վերահսկում» ծրագրի շրջանակում իրականացվող ոչ վարակիչ հիվանդությունների սկրինինգային ծրագիրը, որի շրջանակում 35-68 տարեկան Հայաստանի Հանրապետության բոլոր քաղաքացիները (անկախ բժշկական ցուցումներից) հնարավորություն ունեն անվճար հետազոտվելու սպասարկող առողջության առաջնային պահպանման բժշկական հաստատություններում՝ զարկերակային գերճնշման և շաքարային դիաբետի վաղ հայտնաբերման և ախտորոշման, իսկ 30-60 տարեկան բոլոր կանայք՝ արգանդի պարանոցի նախաքաղցկեղի վաղ ախտորոշման և քաղցկեղի կանխարգելման նպատակով:

2. Նախագծի 1-ին հոդվածով լրացվող 5.1-ին հոդվածը հակասում է «Լիցենզավորման մասին» Հայաստանի Հանրապետության օրենքի պահանջներին, որի համաձայն՝ բժշկական օգնության և սպասարկման իրականացումը լիցենզավորման ենթակա գործունեության տեսակ է, որն իրականացնում են օրենքով սահմանված կարգով լիցենզավորված անհատ ձեռնարկատերերը, իրավաբանական անձինք և պետական կամ տեղական ինքնակառավարման մարմին չհանդիսացող պետական կամ համայնքային հիմնարկները: Ուստի Հայաստանի Հանրապետության կառավարությունը չի կարող իրականացնել Հայաստանի Հանրապետության քաղաքացիների պարտադիր կանխարգելիչ բժշկական քննություն:

3. Պարզ չէ, թե ինչ հիմքով է որոշվել քաղաքացիների պարտադիր կանխարգելիչ բժշկական քննության պարբերականությունը և հասկանալի չէ թե այն որ տարիքային խմբերի շրջանում է իրականացվելու:

4. Նախագծի ընդունումը լրացուցիչ ֆինանսական հատկացումների անհրաժեշտություն է առաջացնում, ինչը «Հայաստանի Հանրապետության 2016 թվականի պետական բյուջեի մասին» Հայաստանի Հանրապետության օրենքով, ինչպես նաև Հայաստանի Հանրապետության առողջապահության նախարարության պետական բյուջեի հաշվին կատարվող ծախսերի ֆինանսավորման կողմնորոշիչ չափաքանակները հաստատելու վերաբերյալ Հայաստանի Հանրապետության կառավարության 2014 թվականի հուլիսի 3-ի N 700-Ն և 2015 թվականի հուլիսի 8-ի N 755-Ն որոշումներով չեն սահմանվում նախագծում նշված պարբերականությամբ սահմանամերձ համայնքներում և դրանց հարակից տարածքներում Հայաստանի Հանրապետության քաղաքացիներին պարտադիր կանխարգելիչ բժշկական քննություն իրականացնելու ֆինանսավորման հնարավորություններ:

Ելնելով շարադրվածից, Հայաստանի Հանրապետության կառավարությունը դեմ է ներկայացված օրենքի նախագծի ընդունմանը:

Միաժամանակ հայտնում ենք, որ, ներկայացված օրենքի նախագիծը Հայաստանի Հանրապետության Ազգային ժողովում քննարկելիս, հարակից զեկուցմամբ հանդես կգա Հայաստանի Հանրապետության առողջապահության նախարար Արմեն Մուրադյանը:

Կից ներկայացվում են օրենքի նախագծի կարգավորման ազդեցության գնահատման եզրակացությունները:

ՀԱՐԳԱՆՔՈՎ՝

ՀՈՎԻԿ ԱԲՐԱՀԱՄՅԱՆ

## ԵԶՐԱԿԱՑՈՒԹՅՈՒՆ

### ԱՌՈՂՋԱՊԱՀՈՒԹՅԱՆ ԲՆԱԳԱՎԱՌՈՒՄ ԿԱՐԳԱՎՈՐՄԱՆ ԱԶԴԵՑՈՒԹՅԱՆ ԳՆԱՀԱՏՄԱՆ

#### **«Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» Հայաստանի Հանրապետության օրենքի նախագծի ընդունման դեպքում**

«Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» Հայաստանի Հանրապետության օրենքի նախագծի ընդունման ազդեցությունը առողջապահության բնագավառի վրա հնարավոր չէ տրամադրել՝ հիմք ընդունելով այն հանգամանքը, որ բացակայում են կանխարգելիչ հետազոտությունների տեսակների, ինչպես նաև դրանք բնակչության որոշակի տարիքային խմբերում իրականացնելու վերաբերյալ ելակետային տվյալները:

### ԱԶԴԵՑՈՒԹՅԱՆ ԳՆԱՀԱՏՄԱՆ ՄԱՍԻՆ ԵԶՐԱԿԱՑՈՒԹՅՈՒՆ

«Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» Հայաստանի Հանրապետության օրենքի նախագծի բնապահպանության բնագավառում կարգավորման ազդեցության գնահատման մասին եզրակացությունը

1. «Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» Հայաստանի Հանրապետության օրենքի նախագծի (այսուհետ՝ Օրենք) ընդունման արդյունքում շրջակա միջավայրի օբյեկտների՝ մթնոլորտի, հողի, ջրային ռեսուրսների, ընդերքի, բուսական և կենդանական աշխարհի, հատուկ պահպանվող տարածքների վրա բացասական հետևանքներ չեն առաջանա:
2. Օրենքի նախագծի չընդունման դեպքում շրջակա միջավայրի օբյեկտների վրա բացասական հետևանքներ չեն առաջանա:
3. Օրենքի նախագիծը բնապահպանության ոլորտին չի առնչվում, այդ ոլորտը կանոնակարգող իրավական ակտերով ամրագրված սկզբունքներին և պահանջներին չի հակասում:  
Օրենքի կիրարկման արդյունքում բնապահպանության բնագավառում կանխատեսվող հետևանքների գնահատման և վարվող քաղաքականության համեմատական վիճակագրական վերլուծություններ կատարելու անհրաժեշտությունը բացակայում է:

**ՀԱԿԱԿՈՌՈՒՊՏԻՈՆ ԲՆԱԳԱՎԱՌՈՒՄ ԿԱՐԳԱՎՈՐՄԱՆ ԱԶԴԵՑՈՒԹՅԱՆ ԳՆԱՀԱՏՄԱՆ  
ԵԶՐԱԿԱՑՈՒԹՅՈՒՆ**

**«Սահմանամերձ համայնքների սոցիալական աջակցության մասին» Հայաստանի  
Հանրապետության օրենքում լրացում կատարելու մասին» Հայաստանի  
Հանրապետության օրենքի նախագծի վերաբերյալ**

«Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» Հայաստանի Հանրապետության օրենքի նախագիծն իր մեջ Հայաստանի Հանրապետության կառավարության 2009 թվականի հոկտեմբերի 22-ի «Նորմատիվ իրավական ակտերի նախագծերի հակակոռուպցիոն բնագավառում կարգավորման ազդեցության գնահատման իրականացման կարգը հաստատելու մասին» թիվ 1205-Ն որոշմամբ հաստատված կարգի 9-րդ կետով նախատեսված որևէ կոռուպցիոն գործոն չի պարունակում:

Եզրակացություն

**«Սահմանամերձ համայնքների սոցիալական աջակցության մասին» Հայաստանի  
Հանրապետության օրենքում լրացում կատարելու մասին» ՀՀ օրենքի նախագծի  
վերաբերյալ սոցիալական պաշտպանության ոլորտում կարգավորման ազդեցության  
գնահատման**

«Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» ՀՀ օրենքի նախագծի (այսուհետ՝ նախագիծ) սոցիալական պաշտպանության ոլորտում կարգավորման ազդեցության գնահատումը կատարվել է «իրավական ակտերի մասին» ՀՀ օրենքի 27.1 հոդվածի և ՀՀ Կառավարության 2010 թվականի հունվարի 14-ի թիվ 18-Ն որոշման համաձայն:

Նախագծի սոցիալական պաշտպանության ոլորտում կարգավորման ազդեցության գնահատումը կատարվել է սոցիալական պաշտպանության ոլորտի և դրա առանձին ենթաօլորտների իրավիճակի բնութագրիչների և դրանց ինդիկատորների հիման վրա:

Նախագիծը՝

ա) ռազմավարական կարգավորման ազդեցության տեսանկյունից ունի **դրական ազդեցություն**.

բ) շահառուների վրա կարգավորման ազդեցության տեսանկյունից ունի **դրական ազդեցություն**:

### ԵԶՐԱԿԱՑՈՒԹՅՈՒՆ

**«Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» ՀՀ օրենքի նախագծի տնտեսական, այդ թվում՝ փոքր և միջին ձեռնարկատիրության բնագավառում կարգավորման ազդեցության գնահատման**

«Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» ՀՀ օրենքի նախագծի (այսուհետ՝ Նախագիծ) գործարար և ներդրումային միջավայրի վրա կարգավորման ազդեցության գնահատման նպատակով իրականացվել են նախնական դիտարկումներ:

Գնահատման նախնական փուլում պարզ է դարձել, որ Նախագծով *առաջարկվում է վեց ամիսը մեկ անգամ սահմանամերձ համայնքներում և դրանց հարակից տարածքներում իրականացնել ՀՀ քաղաքացիների պարտադիր կանխարգելիչ բժշկական քննություն* և Նախագծի ընդունման դեպքում, դրա կիրարկման արդյունքում գործարար և ներդրումային միջավայրի վրա **ազդեցություն չի նախատեսվում:**

### ԵԶՐԱԿԱՑՈՒԹՅՈՒՆ

**«Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» ՀՀ օրենքի նախագծի մրցակցության բնագավառում կարգավորման ազդեցության գնահատման**

«Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» ՀՀ օրենքում փոփոխություններ և լրացումներ կատարելու մասին ՀՀ օրենքի նախագծի (այսուհետ՝ Նախագիծ) ընդունման պարագայում՝ Հայաստանի Հանրապետության կառավարությունը վեց ամիսը մեկ անգամ կիրականացնի սահմանամերձ համայնքներում և դրանց հարակից տարածքներում ՀՀ քաղաքացիների պարտադիր կանխարգելիչ բժշկական քննություն:

Նախագծով կարգավորվող շրջանակները չեն առնչվում որևէ առանձին ապրանքային շուկայի հետ, ուստի և Նախագծի ընդունմամբ որևէ առանձին ապրանքային շուկայում մրցակցային դաշտի վրա ազդեցություն լինել չի կարող:

Հիմք ընդունելով նախնական փուլի արդյունքները՝ կարգավորման ազդեցության գնահատման աշխատանքները դադարեցվել են՝ արձանագրելով Նախագծի ընդունմամբ մրցակցության միջավայրի վրա ազդեցություն չհայտնաբերվելու եզրակացություն:

## **ԵՋՐԱԿԱՑՈՒԹՅՈՒՆ**

**«Սահմանամերձ համայնքների սոցիալական աջակցության մասին» Հայաստանի  
Հանրապետության օրենքում լրացում կատարելու մասին» ՀՀ օրենքի նախագծի՝  
բյուջետային բնագավառում կարգավորման ազդեցության գնահատման վերաբերյալ**

Նախագծով առաջարկվում է «Սահմանամերձ համայնքների սոցիալական աջակցության մասին» Հայաստանի Հանրապետության օրենքում լրացում կատարելու մասին» ՀՀ օրենքը լրացնել նոր դրույթով, համաձայն որի սահմանամերձ համայնքներում և դրանց հարակից տարածքներում բնակվող ՀՀ քաղաքացիների համար ՀՀ կառավարությունը վեց ամիսը մեկ անգամ պետք է իրականացնի պարտադիր կանխարգելիչ բժշկական քննություն ՀՀ պետական բյուջեի միջոցների հաշվին՝ ՀՀ կառավարության սահմանած կարգով:

Կատարված վերլուծությամբ պարզվել է, որ Նախագծի ընդունման դեպքում՝

1. սահմանամերձ համայնքներում և դրանց հարակից տարածքներում բնակվող ՀՀ քաղաքացիների պարտադիր կանխարգելիչ բժշկական քննության նպատակով հատկացվելիք գումարների մասով այլ հավասար պայմաններում կառաջանա ՀՀ պետական բյուջեից լրացուցիչ հատկացումներ կատարելու անհրաժեշտություն խիստ մոտավոր հաշվարկներով շուրջ 0.7 մլրդ դրամի չափով,

2. նշված գումարների հատկացման դեպքում կարող են ձևավորվել լրացուցիչ հարկվող եկամուտներ, ուստի Նախագծի ընդունումը ՀՀ պետական բյուջեի եկամուտների վրա կարող է ունենալ դրական ազդեցություն:

Հարկ է նշել նաև, որ բոլոր դեպքերում Նախագծի ընդունմամբ պայմանավորված ՀՀ պետական բյուջեից լրացուցիչ կատարվելիք ծախսերը էականորեն կգերազանցեն ՀՀ պետական բյուջե լրացուցիչ ստացվելիք եկամուտները:

Միաժամանակ, Նախագծի ընդունումը համայնքների բյուջեների ծախսերի և եկամուտների վրա կունենա չեզոք ազդեցություն:



Պ-943-05.02.2016-SS-010/0

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՕՐԵՆՔԸ**

**«ՍԱՀՄԱՆԱՄԵՐԶ ՀԱՄԱՅՆՔՆԵՐԻ ՍՈՑԻԱԼԱԿԱՆ ԱԶԱԿՑՈՒԹՅԱՆ ՄԱՍԻՆ» ՀԱՅԱՍՏԱՆԻ  
ՀԱՆՐԱՊԵՏՈՒԹՅԱՆ ՕՐԵՆՔՈՒՄ ԼՐԱՑՈՒՄ ԿԱՏԱՐԵԼՈՒ ՄԱՍԻՆ**

**Հոդված 1.** «Սահմանամերձ համայնքների սոցիալական աջակցության մասին» Հայաստանի Հանրապետության 2014 թվականի դեկտեմբերի 1-ի ՀՕ-203-Ն օրենքը (այսուհետ՝ օրենք) լրացնել հետեւյալ բովանդակությամբ նոր 5.1 հոդվածով.

«Հոդված 5.1 Հայաստանի Հանրապետության կառավարությունը վեց ամիսը մեկ անգամ իրականացնում է սահմանամերձ համայնքներում եւ դրանց հարակից տարածքներում Հայաստանի Հանրապետության քաղաքացիների պարտադիր կանխարգելիչ բժշկական քննություն:

Արտահիվանդանոցային պայմաններում պարտադիր կանխարգելիչ բժշկական քննության բժշկական ծառայությունների ցանկը հաստատում է Հայաստանի Հանրապետության կառավարությունը:»:

**Հոդված 2.** Սույն օրենքն ուժի մեջ է մտնում 2016 թվականի հուլիսի 1-ից:

**ՀԻՄՆԱՎՈՐՈՒՄ**

**«ՍԱՀՄԱՆԱՄԵՐԶ ՀԱՄԱՅՆՔՆԵՐԻ ՍՈՑԻԱԼԱԿԱՆ ԱԶԱԿՑՈՒԹՅԱՆ ՄԱՍԻՆ» ՀԱՅԱՍՏԱՆԻ  
ՀԱՆՐԱՊԵՏՈՒԹՅԱՆ ՕՐԵՆՔՈՒՄ ԼՐԱՑՈՒՄ ԿԱՏԱՐԵԼՈՒ ՄԱՍԻՆ» ՀԱՅԱՍՏԱՆԻ  
ՀԱՆՐԱՊԵՏՈՒԹՅԱՆ ՕՐԵՆՔԻ ՆԱԽԱԳԾԻ ՎԵՐԱԲԵՐՅԱԼ**

Առաջարկվող օրենքի նախագծի հիմնական նպատակն է նպաստել՝ սահմանամերձ գյուղերում բնակվող ՀՀ քաղաքացիների կենսամակարդակի բարելավմանը՝ իրականացնելով պարտադիր կանխարգելիչ բժշկական քննություն տարվա մեջ առնվազն երկու անգամ: Նախագիծը նպատակաուղղված է ՀՀ սահմանամերձ բնակչության սոցիալական կարիքների բավարարմանը, ինչպես նաեւ սահմանամերձ բնակավայրերից քաղաքացիների արտահոսքի կրճատմանը:

Ներկայումս, սահմանամերձ բնակավայրերի քաղաքացիները՝ ելնելով ֆինանսական սուղ պայմաններից, ինչպես նաեւ լինելով բավականին հեռու առողջության առաջնային պահպանում իրականացնող բժշկական կազմակերպությունից, որտեղ նրանք սահմանված կարգով գրանցված են, շատ հաճախ չեն իրականացնում անհրաժեշտ պրոֆիլակտիկ զննումներ: Սա կարող է պատճառ հանդիսանալ, որպեսզի որոշ հիվանդություններ, որոնք հնարավոր էր հայտնաբերել զարգացման վաղ շրջանում եւ կանխել այն՝ էլ ավելի խորանա, հետեւաբար ավելի դժվարանա դրանց բուժման ընթացքը:

Նախագծով առաջարկվում է 2016 թվականի հուլիսի 1-ից 6 ամիսը մեկ անգամ իրականացնել ՀՀ կառավարության կողմից հաստատված ցանկում ներառված սահմանամերձ գյուղական համայնքներում բնակչության պարտադիր կանխարգելիչ բժշկական քննություն:

Ակնկալվում է, որ նախագծի ընդունման արդյունքում կկրճատվի սահմանամերձ գյուղերում բնակվող ՀՀ քաղաքացիների հիվանդությունների թիվը, կբարձրանա նրանց աշխատունակությունը: Այսպիսով, ունենալով առողջ բնակչություն սահմանամերձ համայնքներում, դրանով իսկ կնպաստենք ՀՀ սահմանների էլ ավելի արդյունավետ պահպանմանը: